

## RASHI LEVÍ-PAENI

<sup>1</sup> Ari iñaanateeri Tajorentsi irika Moisés, ijekaki tajorentsi-thaanteki, ikanteeri:

<sup>2</sup> “¡Moisés! Pikenkitha-waetakaeri pisheninka-paeni Israel-paeni, pikanteri: ‘Aririka pamakiniri Tajorentsi pipayiteriri, pamakiniri piwaakati, eerorika pamakiniri powishate.

<sup>3</sup> Riirika waaka pipiriri katziyen-katatsini iyachaarinka pitaakiririka, riitaki paanaki shiram-pari, eero ramashi-waeta. Tema riitaki ookimotyaarini Tajorentsi pitaa-kiniriri opatzimooki tajorentsi-thaante.

<sup>4</sup> Pioteya-yinatiri iitoki katziyen-katatsini iyachaarinka pitaani, tema riitaki ookimotyaarini Tajorentsi ipeyako-tantee-mirori pantakirowa kaariperotatsiri.

<sup>5</sup> Powamayiri pipira tajorentsi-thaanteki. Rayimae-tyaawo itomi-paeni Aarón, Omperatajorentsi-taarewo, riraa pipira rashita-kaeyaari Tajorentsi, itsikirijan-tyaawo onampi-naki-paeni taapokimentotsi ojeekakira opatzimookiki Tajorentsi-thaante.

<sup>6</sup> Aririka powamaakiri, pimeshaayiri imashi, pitoyitiro maawoeni iwatha.

<sup>7</sup> Riima itomi-paeni Ompera-tajorentsi-taarewo Aarón, riitaki oejatsini paamari taapokimentotsiki, riitaki oonthoyitironi tsitsi-paeni paamatasini.

<sup>8</sup> Rijatzi itomi-paeni Aarón Omperatajorentsi-taarewo, owankita-kirini iwatha ipira

opaamatakira tsitsi, itsipataakiri iito, eejatzi iyeenka-paeni.

<sup>9</sup> Eerokataki kewironi isheeto-paeni, eejatzi ipori-paeni. Itayimae-tyaari Ompera-tajorentsi-taarewo taapokimentotsiki. Okatziyenkatyaa iyachaarinka itaaha. Rootaki ookimotantyaariri Tajorentsi iñaaperotaari rashitakaetariri.

<sup>10</sup> Riirika owisha, riirika cabra pashita-kaariri Tajorentsi katziyen-katatsini iyachaarinka pitaakiri, riitaki paanaki shirampari, eero ramashi-waeta.

<sup>11</sup> Powamayiniri Tajorentsi jantakiroki taapokimentotsiki okatonkontzira. Rayiro itomipaeni Aarón, Ompera-tajorentsi-taarewo, riraa itsikirijan-takyaawo maawoeni onampi-naki-paeni taapokimentotsi.

<sup>12</sup> Opoñaashitya pitoyitakiri maawoeni iwatha, iito eejatzi iyeenka-paeni. Raakiri Omperatajorentsi-taarewo, rowanki-takiri opaamatakira paamari taapokimentotsiki.

<sup>13</sup> Eerokataki kewironi isheeto-paeni, eejatzi ipori-paeni. Itaayitiro Ompera-tajorentsi-taarewo rowanki-takiri taapokimentotsiki. Okatziyenkatyaa iyachaarinka itaaha. Rootaki ookimotantyaariri Tajorentsi iñaamaperotaari rashitakaetariri.

<sup>14</sup> Riirika shiwankiri pashita-kaeyaariri katziyen-katatsini iyachaarinka pitaakiri, pamakiniri shiro, eerorika iryaani jamomo.

<sup>15</sup> Riitaki Ompera-tajorentsi-taarewo ashitakaeyaariri Tajorentsi. Ithatyaakiri iitoki, ipitenkan-takyaawo riraa maawoeni onampi-naki taapokimentotsi, itaakiri taapokimentotsiki.

<sup>16</sup> Paawakiro ishenokitziro rowanawo, eejatzi ishiwanki-paeni. Pookakiro onampi-naki taapokimentotsi ishitowa-piintzira ooryaa, jempe opiyotaka ojamampoti itahaetani.

<sup>17</sup> Pitankapetatiri eero pithatyaa-waetziri. Itayiri Ompera-tajorentsi-taarewo taapokimentotsiki. Okatziyeenkatyaa iyachaarinka itaaha. Rootaki ookimotantyaariri Tajorentsi iñaamaperotyaari rashitakaetariri.

## 2

<sup>1</sup> Roorika pankirentsi-pane pamaki pashita-kaeyaari Tajorentsi, pamaki rooperori opane, powaetakiro yeenkantsi eejatzi kajankari.

<sup>2</sup> Pamakiniri itomi-paeni Aarón, Omperatajorentsi-taarewo. Raawaki eepichokiini powaeta-kirori yeenkantsi, eejatzi kajankari. Itaakiro taapokimentotsiki. Rootaki ookimotantyaariri Tajorentsi iñaamaperotyaawo itahae-takiniriri rashita-kaetariri.

<sup>3</sup> okaate tzimahaan-taneen-tsini opane pashita-kaariri Tajorentsi, tajorentsi-pane-tanaki iroka. Riitaki owaeyaawoni Aarón eejatzi itomi-paeni.

## 11

<sup>1</sup> Rapiiteero Tajorentsi iñaanateeri Moisés eejatzi Aarón, ikanteeri:

<sup>2</sup> “Pikenkitha-waetakaeri pisheninka Israel-paeni, pikanteri: ‘Irika tsimeriyitatsiri ikaatzi jeekayitsiri antamiki, riitake kameethatatsiri poyaari.

<sup>3</sup> Tema maawoeni tsimeriyitatsiri tzimatsiri apiti ishetaki, oepiyirori rowanawo iniyawitakawo, inaataawaero kameetha iniyero eejatzi, tee ipinkae-tziri irika-paeni, kameetha-tatsi rowaetyaari.

<sup>4</sup> Riima ikaatzi ikyaakoetari, tzimawitachari apiti ishetaki, kaari oepiyironi rowanawo te inaa-perotziro iniyantyaawori, tee ikameethatzi poyaari, pipinkiri.\*

<sup>5</sup> Ari ikimitari oshiyawi-tariri kochero, kaari oepiyironi rowanawo tee inaa-perotziro iniyantyaawori, teemaeta otzimi apiti ishetaki, riitaki pipinkiri.†

<sup>6</sup> Ari ikimitari oshiyawi-tariri jamani, kaari oepiyironi rowanawo tee inaa-perotziro iniyantyaawori, tee otzimi apiti ishetaki, riitaki pipinkiri.‡

<sup>7</sup> Eejatzi ikemitari chaancho, tzima-witacha apiti ishetaki, kaari oepiyironi rowanawo tee inaa-perotziro iniyantyaawori, riitaki pipinkiri.

<sup>8</sup> Eero powayitari irika iwathapaeni, eero poteyaneentziri eepichokiini ikami-rika, riitaki pipinkiri.

<sup>9</sup> Irika jeekantawori nijaa-paeni, riitaki kameetha-tatsiri poyaari tee ipinkae-tziri. Tema maawoeni tzimatsiri ipeteeshi, eejatzi ipentaki, ikaatzi jeekantawori inkaari eejatzi nijaa-paeni, tee ipinkae-tziri irika-paeni, kameetha-tatsi poyaari.

<sup>10</sup> Riima kaari tzimatsini ipeteeshi-paeni,

\* **11:4** ikyaakoetari = camello   † **11:5** oshiyawi-tariri kochero = tejón, conejo   ‡ **11:6** oshiyawi-tariri jamani = liebre

ipentaki-paeni jeekantawori inkaare eejatzi  
nijaa-paeni, ikaatzi jeekantawori inthomoyaaki  
nijaa, piwinkani poyeri.

<sup>11</sup> Eero powayitari irika-paeni, riitaki pipinkiri.  
Eero poteayneentziri aririka ikamayiti.

<sup>12</sup> Riitaki pipinkayitiri maawoeni jeekatsiri  
nijaaki kaari tzimatsini ipeteeshi-paeni, eejatzi  
ipentaki-paeni.

<sup>13</sup> Irika shiwankiri-paeni ikaati pipinka-yiteeri,  
kaari kameetha-tatsini poyaari: pakitha, awo,  
shimapako,

<sup>14</sup> tzijo, ikaatzi oshiyayi-tariri shirontzi,

<sup>15</sup> ikaatzi inashi-yitachari tsiirotyonki, §

<sup>16</sup> ikaatzi oshiyayi-tariri mamawo, oshetatsiko,  
cherepito, ikaatzi oshiyayi-tariri pakitha,

<sup>17</sup> pawo, thoowo,

<sup>18</sup> janantzi, thawori, amempori,

<sup>19</sup> thompari, ikaatzi oshiyayi-tariri janantzi,  
tsimpe, piiri.

<sup>20</sup> Irika itsipa ikaatzi pipinkiri, naapakitsiri  
tzimatsiri ishiwanki, tzimatsiri iityeeriki ranashit  
tantari.

<sup>21</sup> Riima maawoeni oshiyariri inaapaki tzimat  
siri ipori, mitaatsiri, eero pipinka-yitziri poyaari.

<sup>22</sup> Irika ikaati poyaari: ikaatzi oshiyayi-tariri  
tsitsiri, pitziro, tsinawo, kentori.

<sup>23</sup> Riima itsipa-paeni ikaatzi kaari apaeriiri  
inaapaki-witachari, aayita-tsiri, anashiyita-chari,  
riitaki pipinkiri.

<sup>24</sup> Iroka-paeni otsipa matironi osheneemini.  
Itzimi-rika oteeyakirini ikamirika ipinkaetani

tsimiriyyitatsiri, ari ipinkaetanakiri irirori roojatzi tsireniriki.

<sup>25</sup> Itzimi-rika antakironi eepichokiini iwatha kaminkari tsimeriyitatsiri, otzimatyeet ikiwaero iithaari, ari ipinkaetanakiri roojatzi tsireniriki.

<sup>42</sup> Tema tee ikameethatzi powayityaari ikaatzi konthaa-chari kepatsiki, anayita-tsiri kepatsiki, otzimawityaa iityeeriki-paeni, riitaki pipinkayitiri.

<sup>43</sup> Pipinkayitiri ikaatzi anayita-tsiri kepatsiki, ikaatzi kamatha-yitatsiri, tema aririka poteeyakiri, ari ipinkaetanakimi eeroka.

<sup>44</sup> Tema Naaka Pitajorentsite. Pikiteshiretee eeroka-paeni, tema naaka kiteshireri. Tee okameethatzi rowaaripero-waetimi tsimeriyitatsiri ikaatzi anashiyitachari kepatsiki.

<sup>45</sup> Naakataki Tajorentsi, naaka oemishitowaemiri Apitantoniki Pitajorents-tetee-na. Pikiteshiretee, tema naaka kiteshireri.”

<sup>46</sup> Rootaki iroka ñaantsi riyotaan-tziri Tajorentsi jempe ikantakota tsimeri-paeni jeekatsiri antamiki, shiwankiripaeni, maawoeni añaayitasiri nijaaki, maawoeni kamathaa-yitatsiri kepatsiki.

<sup>47</sup> Ari piyoteeriri ikaatzi ipinkae-tziri eejatzi ikaatzi kameetha-yitatsiri. Ikaatzi rowaetari ee-jatzi kaari rowaetari.

## 12

<sup>1</sup> Ikanta Tajorentsi iñaanateeri Moisés, ikanteeri:

<sup>2</sup> “¡Moisés! Piyoteeri pisheninka Israel-paeni, pikanteri: ‘Aririka omotziti tsinani, otzimakiri shirampari eentsite, ipinkaetiro okaate 7

kiteejeri. Tema oshiyaaawo ipinkae-tziro aririka oñaawentyaa roori.

<sup>3</sup> Aririka imakotapaaki 8 kiteejeri itziman-takari eentsi, itomeshi-taanii-takiri.

<sup>4</sup> Rooma tsinani tzimaaniteentsiri, otzimatye omaerintyaa roori okaate 33 kiteejeri, roojatzi opeyannee-yaari iraa. Tema eero okameethatzi oteeyiro itajorentsi-takahetaanii-paeni, eero okyahae tajorentsi-thaanteki, roojatzi iyomaatan-takyaawori kiteejeri omaerinta.

<sup>5</sup> Roorika otzimakiri tsinani eentsiti, ipinkaetiro okaate 14 kiteejeri. Ari oshiyaaawo ipinkae-tziro aririka oñaawentyaa roori. Tema otzimatye omaerentyaa okaate 66 kiteejeri, roojatzi iyomaatan-takyaawori kiteejeri omaerinta.

<sup>6</sup> Aririka iyomaateero omaeriwentari eentsiti shirampari, roorika tsinani eentsiti, otzimatye aanakiniri Ompera-tajorentsi-taarewo apaani ipireetari tzimaen-tsiri apaani rojarentsite, ayiniri ejatzi iryani jamomo, riirika apaani shiro. Riitaki katziyen-katatsini iyachaarinka itahaetzirira opatzimooki tajorentsi-thaante okantya rariperoe-tanteeyaawori.

<sup>7</sup> Riitaki raanakiri Ompera-tajorentsi-taarewo, itaa-kiniri Tajorentsi janta tajorentsi-thaanteki rariperoe-teero tsinani. Ari omonkaatari okaatzi omaeriwentaka roori.’”

Rootaki iñaani Tajorentsi iroka. Rootaki ashi tsinani-paeni tzimayi-tatsiri eenchaa-niki shirampari, roorika tsinani.

<sup>8</sup> Eerorika imonkaata amanantan-tyaari ipireetari, kantacha amananti apite shiro,

eerorika apite iryaani jamomo. Riitaki Omperatajorentsi-taarewo matironi raripero-takaanteero, kiteshire-tanee roori. Tema itaaki apaani raripero-tantee-tyaawori tsinani. Riima itsipa katziyeenka iyachaarinka itaakiri.”

## 16

<sup>1</sup> Ari rapiiteero Tajorentsi iñaanateeri Moisés, tema kamaki apitekiro itomi Aarón okantakaawo rontsirokakawo ijekira Tajorentsi.

<sup>2</sup> Iroka ikantzi Tajorentsi: “¡Moisés! Pikanteri pirentzi Aarón, eero ipiya-piyata ikyyee otajorentsi-perotzira tajorentsi-thaante jempe othataka tonta-mawori, ojeekakira neshironka-mentotsi otapawo tajorentsi-naki, ikami-kari. Tema ari noñaaha-kyari nomenko-ryeen-kataki neshironka-mentotsiki.

<sup>3</sup> Aririka ikyyee Aarón tajorentsi-thaanteki, otzimatyyee raanaki apaani ewonkiri waaka ipeyakoe-tantee-yaariri rantakerowa kaaripero-tatsiri. Raanaki eejatzi apaani ipireetari, riitaki katziyeen-katatsini iyachaarinka itaanewo.

<sup>11</sup> Ramaeta-kiniri Aarón ewonkiri waaka, riitaki rowamaakiri, itaawen-tyaari ipeyakoe-tantyaanariri rantakerowa kaariperotatsiri, eejatzi ikaatzi jeekatsiri ipankoki.

<sup>12</sup> Ari raanakiro taa-mentotsi ijaanakiro owaamari-menkiti taapokimentotsi ijekakira Tajorentsi. Apite rowii-panetanaki rakoki opane kajankari. Raanakiro otajorentsi-perotzi jempe othataka tonta-mawori.

<sup>13</sup> Itaakiro opane kajankari jempe ijekakira Tajorentsi. Othonkyaa okachaa-tanaki

neshironka-mentotsi otapaki tajorentsi-naki.  
Rootaki eero ikamanta rirori Aarón.

<sup>14</sup> Opoñaashitaka raanaki eechaakiini  
riraanewonkiri waaka, itsikirijantakyaawo  
neshironka-mentotsi ishitowa-piintzira ooryaa,  
imatakiro eejatzi ikatziyakaha rirori itsikirijakiro  
neshironka-mentotsi okaate 7 rapiipiintiro.

<sup>15</sup> Ari rowamaakiri itsipa ipira, riitaki  
itaawenteetiri rantakirowa kaari-peri atziri-  
paeni. Raanakiro riraan inthomoeki otajorentsi-  
perotzira, itsikirijantakyaawo neshironka-  
mentotsi eejatzi jantakiroki janta ikatziyakaha.  
Imatakiro ikimitaatkawo riraan ewonkiri  
waaka.\*

<sup>16</sup> Rootaki iroopero-tantee-yaari jempe  
otajorentsi-witaka tema rantawerowaitakiro  
pisheninka-paeni. Ari ikantakirori eejatzi  
maawoeni tajorentsi-thaante, ojatekaen-  
chari ipanko-thaante-yitaka ikaatzi kaariperoy-  
yiteentsiri.

<sup>17</sup> Aririka ikyii Aarón jempe otajorentsitaki  
rariperotrotsiri rirori, ikaatzi jeekatsiri ipankoki,  
eejatzi iyaari-peronka maawoeni isheninka  
Israel-paeni.

<sup>18</sup> Ari riyatanaki ojeekaki taapokimentotsiki  
omontetakari jempe ijeeki Tajorentsi, itajorentsi-  
takaero taapokimentotsi. Raakotanaki eechaaki-  
ni riraan ewonkiri waaka eejatzi rashipireetari,

---

\* <sup>16:15</sup> ipira = cabrío

itziritakiro ochee-paeni taapokimentotsi.<sup>†</sup>

**19** Itsikirijan-takyaawo iraantsi taapokimentotsi okaate 7 rapiipintiro. Ikiteta-kahaero rowaariper-waetakiro pisheninka Israel-paeni, itajorentsi-takahaero.

**29** Iroka nojankinatani rootaki pikenkishiryapiin-teeyaari. Aririka omonkaateyaa kiteejeri 10, kashiri 7, otzimatyeetiziwentyaawo, eero pantawaetee. Ari ikanteyyaari pisheninka, eejatzi itsipa-jatzi atziri jeekimo-tzimiri pipankoki.

**30** Tema iroka kiteejeri aritaki ipheyakoe-teemiro pantakirowa kaariperotatsiri, ari pikiteshiretee eero ka janta jempe ijeekaki Tajorentsi.

**31** Tema ashi owaero nojankina-takaantani, ashi powaero pimako-ryaan-teeyaawo. Pitziwenteyyaawo eejatzi.

**32** Ikite-shire-takahaemi Ompera-tajorentsi-taarewo ijeepatzii-toetakiri, poyaata-kariri ipaapati rompera-tajorentsitzi. Riitaki matironi ipheyako-teeri kaari-peroriite. Ikithaa-teeyaawo kyaari-perori ithaari tajorentsi-mawo-tatsiri.<sup>‡</sup>

**33** Riitaki riropero-takahaeroni otajorentsi-naki-perotzi eejatzi tajorentsi-thaante. Ari ikanteerori taapokimentotsi antaweroetakiri. Imateeri eejatzi Ompera-tajorentsi-taarewo, eejatzi maawoeni pisheninka-paeni ikaateyakinira.

**34** Ashi owaero iroka nojankina-takaantani. Tema apawo-jatzi ojarentsiki ikyahaeti ipheyakoe-

---

<sup>†</sup> **16:18** ipireetari = cabrío    <sup>‡</sup> **16:32** kyaari-perori ithaari = lino

tantyaawori rantayitzirowa kaari kameethatatsi Israel-paeni.”

Tema imatakiro Moisés okaatzi ikantakiriri Tajorentsi.

## 20

<sup>1</sup> Ikanta Tajorentsi iñaanateeri Moisés, ikantziri:

<sup>2</sup> “Iroka otsipa pikantiriri pisheninka Israel-paeni: ‘Ikaati ashitakae-yaarini reenchaaniti tajorentsi-niro iiteetziri ‘Pinkathari Itaawen-teetziri Eenchaa-niki-paeni’, otzimathee rowamahaeteri. Okantawityaa riirika Israel-paeni, riirika itsipa-jatzi atsipatari anampiki, rowamahaeteri.

<sup>3</sup> Tema ari nokijaneen-teeri naaka irika-paeni, aritaki nothonkaeri inampiki, tema riitaki owaaripero-takirori tajorentsi-thaante, rowinkatharyaakiro nowaero, okantakaan-tziro rashita-kaakari reenchaa-nikiti tajorentsi-niro iitachari ‘Pinkathari Itaawen-teetziri Eenchaa-niki-paeni’.

<sup>4</sup> Aririka ipiyatha-takyaa itsipa-paeni pisheninka eerorika rowamayiri ikaatzi ashitakaa-kariri reenchaanikiti tajorentsi-niro iiteetziri ‘Pinkathari Itaawen-teetziri Eenchaa-niki-paeni’,

<sup>5</sup> ari nokijaneen-teeri naaka, ari nokanteeri maawoeni isheninka-paeni rirori. Ari nothonkaeri notsipa-taanteeyaari ikaatzi aapatziya-kariri ikaariperotakira, ipinkathawaetashi-takari tajorentsi-niro iiteetziri ‘Pinkathari Itaawen-teetziri Eenchaa-niki-paeni’.

<sup>6</sup> Atziri-paeni ikaati awentee-yaarini sheripiyari-paeni, eejatzi yotantaniri-paeni,

kaariperotaki rirori rawentaakarira. Tema nokijaneentakiri naaka irika atziri, aritaki nothonkaeri inampiki.

<sup>7</sup> Pikameetha-shire-yitee, pikiteshireyitee, tema naaka Pitajorentsi-tetari.

<sup>8</sup> Pikemijan-teero maawoeni noñaani, pantayi-teero eeroka. Tema naaka Tajorentsi, kiteshire-takaemiri.

<sup>9</sup> Ikaati yakaterini ipaapati eejatzi riniro, otzimatyeerowamahaeteri. Tema okantakaantziro riyakatakiri ipaapate eejatzi riniro, rootaki rowamaan-teetyaariri.

<sup>10</sup> Ikaati mayempi-tironi tsinaninentsi, otzimatyeerowamahaeteri apitekiro, tsinani eejatzi shirampari.

**Las Escrituras en Ashéninka Ucayali del Sur  
del Perú**  
**The Holy Bible in the South Ucayali Ashéninka language  
of Peru**

**Las Escrituras en Ashéninka Ucayali del Sur del Perú**  
copyright © 2008 Wycliffe Bible Translators, Inc.

Language: Ashéninka Ucayali del Sur (Ashéninka, South Ucayali)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-08

---

PDF generated using Haiola and XeLaTeX on 18 Apr 2025 from source files dated 31 Aug 2023

db14e188-438b-52a5-9541-56657c3fc3d9